

四庫全書

史部

# 欽定四庫全書

史部

萬壽盛典初集卷十五至十八

詳校官宗人府府丞臣寶光纂

編修臣程嘉謨覆勘

總校官知縣臣楊懋珩

校對官編修臣沈清藻

謄錄監生臣王鉞

欽定四庫全書

萬壽盛典初集卷十五

典禮四

詔一頒

康熙五十二年三月十八日乙未

皇上六十萬壽御殿受朝賀禮畢

特頒

恩詔

駕還宮諸臣隨

詔出天安門外宣讀奉

天承運

皇帝詔曰朕五十餘年上畏下懼以敬以誠覃思上理  
且以一心對越

上帝未嘗瞬息稍懈賴

旻穹之孚祐

祖宗之蔭庇邇來國家蓄積有餘民間年歲頗豐朕以涼

德勉思

列聖體大順公慮患操心敷景運於休期弘基業於光顯  
夙夜冰兢宵旰靡遑屈指春秋年屆六旬矣覽自秦  
漢以下稱帝者一百九十有三享祚綿長無如朕之  
久者朕之虛薄良深歉仄何敢少有倦怠有負孜孜  
圖治之初心況在位久者始勤終忽往往不能垂令  
名於後所以乾惕之懷彌殷深危之念愈切兼之承  
平歲久幅員日廣戶口漸增風俗益薄朕與臣鄰夙  
夜在茲以剛健中正惇大成裕謙尊有終持盈保泰

猶恐未能豈自滿假少有逸豫朕以天下爲心天下  
當亦體朕之衷各矢盡誠皆敦孝敬型仁講讓守已  
奉公務勤職業官僚胥勸人士奮興使遐邇之均被  
小大之咸周以享昇平之福此非朕之德乃

天地

祖宗之賜今朕式慰中外臣民之請博考典禮大沛膏澤  
用稱朕躋世於仁壽之至意所有應行事例開列於  
後

一五嶽四瀆等祀應遣官致祭著照舊例舉行

一歷代帝王陵寢先師孔子闕里應遣官致祭著察例舉行

一凡嶽鎮海瀆廟宇有傾頽者該地方官估計價值具奏修葺以昭誠敬

一歷代帝王陵寢有毀壞者該督撫察明具奏修葺

一

陵寢官員兵丁執事人等俱加恩賜

一自王以下宗室覺羅十五歲以上者俱加恩賜  
一內外大小各官除各以現在品級已得封贈外凡  
陞級及改任者著照新銜封贈

一在京滿漢文官四品以上在外三品以上武官在  
京在外二品以上各送一子入監讀書

一在京滿漢文官五品以下在外文官四品以下在  
京武官三品以下在外武官亦三品以下俱各加一  
級



一内外文武官員除大計軍政處分外現在議革議降議罰戴罪住俸等項各該衙門悉與奏明寬宥

一凡文武官員現在勅督撫提問究擬者盡與豁免  
一内外降級罰俸等官俱著開復調用者仍照原議調用

一先年出征人内有功牌應得官者除抵軍罪外其守雲南城及在隴州控告不准敘功人等所存無幾今皆老邁不能効力茲遇覃恩著兵部查明仍行補

敘

一昔年存亡之秋在在用兵朕所親歷今雖承平而  
武備不可不謹故時加訓練八旗兵丁盡已精銳茲  
特大沛恩賜護軍校前鋒及護軍各賞給一年錢糧  
撥什庫披甲人各賞半年錢糧外省駐防之兵亦照  
此例

一年尚未老傷廢辭職官員及傷廢退甲兵丁酌給  
錢糧米石

一滿洲兵丁原係披甲効力行間因疾病年老閒住者著察加恩賜

一各直省綠旗兵丁俱應加賞賚著議奏

一海宇承平已久戶口日繁地畝竝未加廣宜施寬大之恩共享恬熙之樂嗣後直隸及各省地方官遇編審之期察出增益人丁止將實數另造清冊奏聞其徵收錢糧但據康熙五十年丁冊定爲常額續生人丁永不加賦仍不許有司於造冊之時藉端需索

用副朕休養生息之意

一天下地丁錢糧既沛恩澤於三年內悉予豁免其自京城及各省房地租稅多係貧民賃僦官地棲身營業宜併蠲恤以覃恩惠著察明京城內併各省每年地租額數於康熙五十三年豁免一年其歷年逋欠若干一并察明免其追補

一八旗滿洲蒙古漢軍兵丁及內扎薩克喀爾喀等蒙古年七十八九十以上者分別賞賚至百歲者

題明給與建坊銀兩

一軍民年七十以上者許一丁侍養免其雜派差役  
八十以上者給與絹一疋綿一斤米一石肉十斤九  
十以上者倍之至百歲者題明給與建坊銀兩

一督撫係封疆大吏地方利弊聞見必真凡關係籌  
餉節用裨益兵民事宜如有確見著據實條奏果屬  
可行著有成效卽從優擢用

一督撫題補各官原從地方需才起見或受任之後

有行事乖張貪縱虐民者該督撫不時體訪據實叅奏勿得以曾經保舉瞻顧徇如故爲隱庇別經發覺將該督撫一并從重治罪

一地方大小官員當以仁慈爲本妄聽奸民捏詞誣告以致陷害良民其害更甚於貪如各省督撫以下及有司官員有濫受詞狀貽害善良者事覺定從重治罪

一各處關差如有將不應納稅之物額外橫征差役

四出分踞津隘擾害商民者該督撫題叅若不行題叅事情發覺一併從重治罪

一雜派項款永行禁革以安民生該督撫嚴察禁革如有仍前濫征者或經叅奏或被發覺定行從重治罪

一濫動重刑舊有嚴禁有司官員有因小事輒行夾訊竝違例妄用非刑者該督撫即行察叅具奏從重治罪

一恤兵原以爲民兵丁專賴糧餉養生天下兵餉皆不實給以致兵不精銳且至失所應嚴行申飭著各督撫提鎮不時稽查禁革如有仍前虛冒扣剋不實行支給者定行從重治罪

一國子監監生免坐監一箇月

一各省儒學以正貢作恩貢次貢作歲貢

一地方有山林隱逸懷才抱德之士著該督撫核實具奏酌與錄用



一滿漢孝子順孫義夫節婦該管官細加諮訪確具事實奏聞禮部核實以憑旌表

一除革職降級休致回籍外地方人才果有才行著聞及學問優長者著該督撫核實具奏

一罰贖積穀原以備賑冬月嚴寒恐鰥寡孤獨貧民無以爲生著直隸各省督撫責令有司官將積穀酌量賑濟毋令奸民假冒支領

一各處養濟院所有鰥寡孤獨及殘疾無告之人有

司留心以時養贍毋致失所

一天下驛遞苦累凡乘傳員役騷擾驛遞者著該督撫立行叅奏如有容隱一并治罪

一各省會設兵處所有等奸民假充兵丁濶入營內夥告夥証拖累小民甚有借通賊爲名抄掠殷實尤爲大害該將軍督提鎮將嚴行約束務絕害端如有隱徇不究一體從重處治

一各地方有豪紳劣衿衙胥積蠹或免本身田地差

徭或包攬他人田地徭丁代爲規避偏累窮民莫此  
爲甚該督撫行各地方官秉公嚴察如有此等情弊  
重加懲處

一官役犯贓罪應至死與不至死者俱免罪仍革職  
革役追贓永不敘用

一凡有叛逆殺死人強盜等罪牽連對質候審監禁  
人犯在獄年久恐無辜致死該部院直省督撫確審  
如無憑實對情可矜疑者即行奏請釋放

一凡應追贓私察果家產盡絕力不能完者槩與豁免毋得株連親族

一凡強盜雖同夥殺人本人未經下手者自行投首准與免罪

一各處盜賊或爲飢寒所累或爲貪官所迫實有可憫如能改過就撫者准赦其罪

一除謀殺故殺外如原無仇隙偶因一時忿激相毆傷重致死者將兇犯免死決杖一百照例追銀四十

兩給付死者家屬

一凡官吏兵民人等有犯除謀反叛逆子孫殺祖父  
父母內亂妻妾殺夫告夫奴婢殺家長殺一家非死  
罪三人採生折割人謀殺故殺蠱毒魘魅毒藥殺人  
強盜妖言十惡等真正死罪不赦外及修造宮殿陵  
寢工程不固冒破錢糧製造戰船軍器等項不堪靡  
費錢糧軍機獲罪貪官衙役犯贓監守自盜冒借官  
庫銀兩侵盜漕糧科場罪案關係河道漕運一應情

罪俱不准赦。騷擾驛遞奸細光棍誣告叛逆放火因奸致死人命罪犯亦在不赦。別項死罪俱減一等內有鬪毆殺人者仍照例追銀四十兩給付死者之家其餘自康熙五十二年三月十八日昧爽以前已發覺未發覺已結正未結正咸赦除之。有以赦前事訐告者以其罪罪之。

於戲錫民以福爲皇極得壽之徵。御衆以寬乃萬國咸寧之本。布告天下咸使聞知。

是月十六日禮部尚書臣赫碩色等謹

奏爲禮儀事康熙五十二年三月十八日恭遇

皇上六旬大慶頒

詔天下和碩親王以下文武大臣官員進

表行禮儀注是日黎明鴻臚寺官將安置

詔書黃案陳設於

太和殿內東旁又設黃案一於

丹陛上正中間又設置

表黃案一於置

詔案次捧

詔雲盤黃傘俱在

丹墀下竝立香亭龍亭陳於

午門前又設高臺置香案於金水橋前內閣大臣捧  
詔書

表文安置於

太和殿內所設各黃案上



皇上陞殿

御寶座和碩親王以下文武大臣官員進

表行

慶賀禮畢內閣大臣請捧

詔書出於

太和殿簷下授於禮部堂官禮部堂官跪受由中階

左旁降安置於

丹陛黃案上行一跪三叩頭禮樂儀衛鳴贊官贊鳴

鞭三下

皇上回宮諸王貝勒貝子公等各散禮部司官一員進  
跪捧

詔書降階捧雲盤官跪接安置雲盤內捧盤起張蓋黃  
傘由中路稍旁出

太和門外丹墀下又司官一員跪接捧出

午門外自龍亭前北向跪安置畢行三叩頭禮校尉  
等擡香亭在前龍亭在後作樂文武大臣官員

隨

詔書至

天安門外金水橋前安置香亭龍亭請

詔官一員行一跪三叩頭禮由龍亭內捧出置高臺黃

案上鴻臚寺贊禮官贊齊集各官排班宣

詔官登臺西向立鴻臚寺官贊有

制衆北向跪宣

詔官宣讀滿漢

詔書畢衆就跪行三叩頭禮再行二跪六叩頭禮畢俱

散禮官安置

詔書於龍亭內校尉擡自

大清門出至禮部衙門月臺上安置於向闕所設案

上供香燭禮部堂司官員行三跪九叩頭禮畢

刊刻

詔書頒行天下爲此具

奏本日奉

旨知道了

四月初二日己酉分遣滿漢官齋

詔頒行天下

直省齋

詔官員

直隸

內閣中書楊柱

江南省

內閣中書費揚古

福建省

內閣中書庫爾禪

浙江省

內閣中書翁翮

江西省

內閣中書富海

湖廣省

禮部筆帖式六十四

河南省

行人司行人王肅章

山東省

翰林院筆帖式關保

山西省

禮部筆帖式馬爾濟

四川省

起居注筆帖式達普哈

廣東省

內閣中書薩爾泰

廣西省

內閣中書巴爾圖

貴州省

行人司行人褚泰

陝西省



翰林院筆帖式巴勒

雲南省

內閣中書巴顏泰

總漕

內閣中書鼎滿岱

總河

翰林院筆帖式六格

朝鮮國頒

詔官員

正使頭等侍衛儀度額真阿齊圖

副使護獵總管穆克登

五官司歷何國柱

六品通官德宜

六品通官桑格

六品通官二格

七品通官袁喜

臣等伏讀

詔書仰見我

皇上博施濟衆之心如天地之無不覆載如日月之無  
不照臨如和風甘雨之無不披拂所謂光被四  
表格於上下者何以加茲夫帝典備載於虞書  
王命時陳於周誥然渾噩之初未為詳備漢始  
稱詔中分四品其恩澤寬大之令要皆隨事立  
名因時間發凡重祠敬祭禮賢賜爵養老卹孤

貸貧讞獄或因災青而肆赦或遇凶歉而蠲除  
偶一舉行即稱盛事自是而降詔令愈繁則實  
惠愈少故稱漢初爲最然司馬遷於高景之詔  
皆不書惟於文帝詔皆稱上曰以其出於帝之  
實意也我

皇上以實心行實惠仁至而義盡德周而恩溥固已度  
越漢文而量之廣遠巍乎煥乎則與帝典王言  
後先同揆今

詔旨所頒修葺祠墓遣官致祭崇祀典也加恩宗室親  
親也錫封賜蔭廣孝慈也加級獎勞也開俸復  
級宥小過也卹軍功給兵賞重武備也嚴雜派  
禁濫刑察牽連止誣奸重民命也除天下之全  
租貸積年之逋稅免日增之戶口重民生也市  
廛則減歲額關梁則禁煩科惠商賈也勅督撫  
戒官吏崇實政也設特科增貢監訪隱逸勵人  
材也建百歲之綽楔賜高年之粟帛七十者許

一丁侍養免其差役養老也申飭養濟院惠漿  
獨也矜不赦恕無辜計罪輕重悉加除宥廣好  
生與愚賤相更始也凡此一日之告令實兼千  
百代未備之敷施一時之恩膏實弘億萬年無  
窮之休養隋王通所云其志也博其言也典淵  
默負宸而澤盈宇宙者也臣等幸際

昌明其踴躍歡忭寧有涯哉所有直省督撫及外藩諸

臣謝

恩疏其遵照成格止報奉

詔日期者不錄餘或抒誠頌揚或代庶僚及耆老士民

兵弁

題謝間錄數章垂之奕禩亦以徵一時臣民慶戴鼓  
舞之休風云

萬壽盛典初集卷十五



欽定四庫全書

萬壽盛典初集卷十六

典禮四

詔二 頒

總督湖廣等處地方軍務兼理糧餉兵部右  
侍郎兼都察院右副都御史世襲拖沙喇哈  
番紀錄二次臣額倫特謹

題爲

聖壽無疆

皇恩普被詳請代

題恭謝

天恩事據湖北布政使司布政使李錫會同陞按察使  
仍管湖北糧儲道事張文燦詳稱欽惟我

皇上道際域中澤流方外一中允執千官仰有道之  
聖人六位時成萬國瞻太平之

天子

丹綸布而命官咨岳籲俊升賢人人得効微長庶績熙

而治定功成禮明樂備事事咸登上理古今極

盛史冊希聞

職

等自揣庸材未足分猷

聖世忝居要職竊慙縻祿

熙時茲於康熙五十二年三月十八日恭遇

皇上六旬正誕方隨班遙祝敬效華封而重異以

頌忽從

金闕臣民喜溢內外歡騰

職

等仰荷

覃恩推封所自并蒙

異數錫蔭後人聞

寵命之自天媿輕埃之益嶽伏願我

皇上膺鴻圖於有永與天地同其久長迺

景命於無疆與山河竝其流峙

職

等感激微誠無由上

達伏乞俯賜會疏代

題又據武昌道金祖誠暨湖北驛鹽上下荆南各道

率各府廳州縣等詳稱欽惟我

皇上中和立極參贊操權調玉燭以乘時八表陽和普

被握璿璣而撫運九天湛露引敷茲奉到康熙  
五十二年三月十八日欽頒

萬壽恩詔

職

等深慙謏劣會際昇平忝荷

貤封喜光前之廣及叨蒙增秩幸品級之忽加而且議  
革議降之員均予寬宥住俸罰俸之案獲邀註  
銷未展寸長先承

曠典惟願歛箕疇之五福暢洽

昌期集華祝之三多瀰淪

壽域於以鞏

皇圖於億禩更兼卜

聖算於萬年矣理合聯銜具詳乞會疏代

題等情又據臣標中軍副將丁沂中左右三營遊擊

守備千把總等撫標中軍遊擊右營遊擊左右

營守備千把總等詳稱欽惟我

皇上文德崇隆武功赫濯靖妖氛於不作處異域者罔  
不來同登部屋於雍熙游康衢者悉皆順則平

成介福清晏呈祥茲欽奉康熙五十二年三月

十八日

萬壽恩詔

聖世何資捍禦而封蔭及於武臣太平豈事干戈而品秩增於將弁

寵榮普被報稱未能伏願我

皇上膺圖御宇既合千八百國爲一家累洽重熙更綿

億萬斯年於有永

職

等感謝之心末由上達伏

乞代

題等情又據湖北闔屬生員劉銘祖等呈稱欽惟我皇上重道崇儒彩煥辟雍之地右文作士光昭

仁壽之天蓋典遇非常則學校雲蒸霞起而

恩逢特沛斯章縫茅拔茹連

萬壽加科多士已彙征而論秀

六旬恩詔耆儒尤次第以聯登正貢作恩既不壅於先  
進次貢作歲更不滯於後來真千載之奇逢實



一時之

異數羣情感激難達

宸聰恭請代

題叩謝

天恩等情又據各屬耆民陳九萬等呈稱伏思我

皇上功邁唐虞

壽同天地垂裳五十二載養老頻仍爲法億萬斯年

恩膏疊沛七十以至耄耋衣帛食肉大賚攸同百年特

重期頤發帑

賜金建坊獨異游無疆之

壽域樂有道之風光扶杖陳詞叩請代

謝等情又據各屬里民蕭天錫等呈稱人安耕鑿皆

由

帝德之高深時樂雍熙實出

皇仁之廣運恭遇

聖主六旬正誕

萬壽恩綸戶口滋生賦不加而民日衆窮黎有養田未  
力而食已敷關津嚴額外之征里井禁雜加之  
派表揚節孝諮訪山林庶獄生全地租豁免到  
處光天化日無非厚澤深仁遙睇

九閭惟呼

萬壽輿情莫達仰請代

題等情又據各營兵丁萬得勝等呈稱竊惟執父荷  
戈生際太平之世卧弓韜甲渾忘熙皞之風坐

糜

天府之金錢已屬千秋難遇復受

皇家之賞賚尤蒙

萬壽殊恩虛冒絕夫行間實惠需夫士伍惟願太平有  
象

聖壽無疆

恩膏與江漢同流

德位共岡陵永峙合詞公懇籲謝

天恩等情各詳呈到臣據此欽惟我

皇上德普如天

恩深浹地欣逢

六旬萬壽徧敷九有

恩綸內外臣工邀

異數而加級封蔭文武士子際

昌時而廣額開科寬使過之

弘仁釋可宥之成讞徵賢養老賞士蠲丁無一人不蒙

其

恩無一物不得其所除湖南各官民人等懇

謝情由已經偏沅撫臣潘宗洛會疏代

題外茲據湖北布政使李錫暨合屬文武官員并士

民兵丁人等各具詳到

臣懇

題謝

恩事屬群情感戴

臣

不敢壅於

上聞謹會同湖廣撫臣劉殿衡合詞代

題伏乞

皇上睿照施行爲此謹

題

巡撫直隸等處地方管轄紫荆密雲等關隘  
贊理軍務督理糧餉兵部右侍郎兼都察院  
右副都御史臣趙宏燮謹

題爲呈請代題恭謝

天恩事欽惟我

皇上功高五帝德邁三王

御極五十二年治臻上理加恩億千萬國化洽時雍恭

遇

聖壽六旬普天同慶

特頒詔款廣布

恩綸文武臣工咸沐非常之異數兵丁耆老均霑格外  
之弘施至若崇祀典蠲租賦敬天勤民之心彌  
久而彌深重學校宥罪愆尚德緩刑之政盡美



而盡善且於

聖天子壽域弘開之日適龍興寺工程完竣之時

御匾甫懸

宸翰輝煌於寶刹天心遂應甘霖旋沛於春畦民欣含  
鼓世慶恬熙四海九州咸樂太平之有象黃童

白叟永賡

仁壽於無疆茲據保定等各府屬紳衿士民紛紛具詞  
公懇由道府宋起等呈請代

題恭謝

天恩前來事出士民感戴真誠不敢壅於

上聞爲此謹

題

巡撫偏沅等處地方提督軍務兼理糧餉都

察院右副都御史臣潘宗洛謹

題爲

仁壽齊天

恩膏沛地詳請代

題恭謝

天恩事據湖南布政使司布政使阿琳按察使司按察

使王朝恩詳稱欽惟我

皇上聖神文武睿知聰明

至德弘敷五十二年太和翔洽

仁恩廣被百千萬國教化流行無瑞不臻有施畢善

職

等恭逢

聖主身際

熙時受養之多年無寸長之報効茲於康熙五十二

年三月十八日恭遇

皇上六旬大慶欽頒

萬壽恩詔臣工士庶盡被

恩膏僻壤遐陬咸霑

德澤普天同慶率土胥歡臣等仰邀封蔭

異數獨隆沐

九重特予之褒嘉貤於祖父荷

萬壽無疆之弘福榮及妻孥更沛寬仁之典載施開復

之

恩寵錫自天報稱無地惟祝我

皇上御萬年之寶歷增億載之璿籌

職

等感激之心無

由上達伏乞代

題等因又據湖南驛鹽糧儲道副使侯惲暨守巡各

道各府廳州縣等詳稱欽惟我

皇上覆冒同天照臨如日配乾坤而立極巍蕩無名集  
功德之大成高深莫測職等欣逢

聖世未報涓埃茲於康熙五十二年三月十八日欽頒  
萬壽恩詔既錫之封典光耀前人復予以進階輝生章  
服愆尤畢宥總沐蓋載之寬弘開復有條益思

捐糜於踵頂

職

等感激私衷名言莫罄惟願靈

長之寶祚奏太平於十雨五風頌乾健之

聖躬開壽域於萬年億禩理合聯銜具詳伏乞代

題恭

謝等因又據臣標中軍遊擊兼管左營事張騰雲暨  
右營遊擊左右營守備千把總等詳稱欽惟我  
皇上聖謨廣運大勇弘施

廟算布而底定滇黔

天戈臨而澄清朔漠久已八荒咸服四海無波矣

職等

虛糜帑帑未効涓埃茲蒙

恩詔寵錫貤封復荷

殊榮倖邀增秩值太平之盛世思報効以何從伏願我  
皇上增無量之

聖算綿有永之

皇圖伏懇代

題恭

謝等因又據湖南監屬各學生員潘弘圖等呈稱欽

惟我

皇上道貫三才勲彌六合因



萬壽以遴才已屬非常之典每十年而增試更開無盡之科茲逢

萬壽恩詔正貢作恩次貢作歲饗序寒儒頓異青衫之舊膠庠下士忽邀稽古之榮猗歟

聖世殊恩允矣

熙朝盛事謹聯名具呈公請

題達等情又據闔屬老民范庭月等呈稱

聖德如天

恩施似海蠲租減賦在在沐雨露之仁養老恤貧人人  
荷生成之德自耕桑以至飲啄盡戴

恩膏由耄耄及於期頤屢蒙

賞賜欽頒

萬壽恩綸徧賚綿帛肉米鼓腹而歌

帝德扶杖而頌

仁恩一丁侍養遂左右之扶持百歲建坊慶里門之光

寵年當衰老運際昇平懇乞代

題恭

謝等情又據闔屬里民周世臣等呈稱宵衣旰食

聖主刻刻勤民鑿井耕田赤子人人樂業蠲租賑貸頻

年疊下

恩綸薄稅省刑無歲不頒

諭旨茲逢

聖主六旬大慶欽頒

恩詔普沛

皇仁生長之黎庶永不加丁逋欠之地租查明豁免蠲  
盡寰區之賦載寬官地之租賑窮黎於冬月訪  
隱逸於潛區寬宥罪人表揚節孝永除雜派禁  
止濫刑雨露均霑高深莫報惟願我

聖主壽同天地福竝岡陵螻蟻微忱懇求上達等情又  
據闔屬兵丁黃永朝等呈稱恭遇欽頒

萬壽恩詔大加賞賚禁止尅冒

天語一宣萬帳得霑實惠帑金廣

賜千軍盡受

殊恩乞代

題恭

謝等情到臣據此欽惟我

皇上化協乾坤光同日月

恩膏久洽乎羣倫

德澤彌深於宇內茲逢

萬壽大慶欽頌

恩詔廣沛

皇仁率土蒙

恩普天戴

德爭祝

皇恩於悠久益徵

聖壽之綿長茲據闔屬臣民老人兵丁人等各具詳呈

公請代

題前來事關羣情感戴不敢壅於

上聞臣謹會同督臣額倫特恭疏代謝

聖恩伏乞

皇上睿照施行謹具

題

知

萬壽盛典初集卷十六



欽定四庫全書

萬壽盛典初集卷十七

典禮四

詔三頒

巡撫福建等處地方提督軍務都察院右副  
都御史臣覺羅滿保謹

題爲

聖壽同天

皇恩如海籲請詳

題代

謝以達輿情事據福建布政使司布政使李發甲呈  
詳據福州興化泉州漳州延平建寧邵武汀州  
臺灣九府并福寧州會詳據各縣詳據通省在  
京領賞八十歲以上老人張獻福郭日新陳萬  
春等在籍領賞候題建坊一百一歲老人李華  
天張岳榮等呈稱福等幸生

聖世飽食煖衣抱子弄孫不知不識優游於光天化日

之下熙恬於歌衢舞巷之中身享太平之樂至  
矣極矣本年恭逢

聖天子六旬大慶福等有赴京叩祝者有在家遙祝者  
欽蒙

皇上下沛殊恩在京叩祝者旣已袖滿

帑金脣霑

御酒在外遙祝者亦得身披溫軟腹飽肥甘又蒙

諭旨渙頒令福等教訓里閭共敦孝弟福等蒙此

天恩無可圖報惟願合天下萬國九州億萬老人之壽  
爲

皇帝萬萬歲一人之壽不勝踴躍歡呼伏乞轉詳代  
題等情又據通省里民方隆遇等呈爲籲請代

題恭謝

天恩事本年三月十八日

萬壽恩詔內開一海宇承平已久戶口日繁宜施寬大  
之恩共享恬熙之樂嗣後直隸各省地方遇編審之

期察出增益人丁止將實數另造清冊奏聞其征收  
錢糧但據康熙五十年丁冊定爲常額續生人丁永  
不加賦仍不許有司於造冊之時藉端需索用副朕  
休養生息之意欽此

恩綸到日兆姓歡呼鑿井耕田鼓舞方深於

帝德食毛踐土輸將敢後於丁男乃戶口之日增竟正  
供之永定孳生不已賦額無加真小民意外之  
殊恩實亘古未聞之

曠典山陬海澨僻壤窮鄉莫不同祝

萬年與天無極伏乞轉詳代

題等情又據同安縣詳據廈門環海四里里民曾天

祐等呈爲懇賜代

題恭謝

天恩事竊祐等身戴光天生居窮島依棲王土僦租分

所應輸結構茅簷逋欠情非得已乃荷

皇恩浩蕩

聖澤弘深伏讀康熙五十二年三月十八日

恩詔一款內開一天下地丁錢糧既沛恩澤於三年內  
悉予豁免其自京城及各省房地租稅多係貧民賃  
僦官地棲身營業宜并蠲恤以覃恩惠著察明京城  
內并各省每年地租額數於康熙五十三年豁免一  
年其歷年逋欠若干一并察明免其追補欽此既免  
明年之正額復蠲歷歲之積逋澤國蒼生同申  
華祝海隅赤子共效蒿呼但螻蟻下忱末由自

達特懇轉詳代

題等情各詳到司據此該本司布政使李發甲看得

世際昇平群頌

一人之有慶時逢泰運共祝

萬壽以無疆喜溢臣民歡騰中外本年三月十八日恭

遇

皇上六旬大慶萬國高呼

恩詔渙頒



皇仁遐被賚予周於耄耄賦額定於丁男僦地窮簷尤  
邀

聖澤積逋新賦總荷蠲除凡茲子惠之

殊恩遠軼唐虞之盛事一時山陬海澨白叟黃童無不  
歡聲雷動叩首輸忱茲據通省各該府州縣詳  
據闔省老人里民等環籲詳請代

題等情前來事關萬民感謝真情所當據呈轉詳乞  
賜代

題以達輿情等因到臣據此欽惟我

皇上道備高深治超今古立文武聖神之極四海尊親  
受位祿名壽之歸萬邦和會璇圖廣運巽風共  
解雨頻施

寶錄光昭華祝與衢謠共進當久道化成之日正  
六旬萬壽之期歛多福於

一人沛

覃恩於九有

鳳詔來從天表喜溢臣工星輶馳自日邊歡騰士庶已  
備呈其謝悃終莫罄乎名言況夫孝弟力田返  
淳風於禮讓乞言憲老追隆治於雍熙扶杖觀

太平

帝錫高年之粟帛躋堂介耆壽人嘗

天府之壺觴乾資始坤資生戶口日增億萬天之高地  
之厚賦役盡緩二三念廣大之幅員尺地莫非  
王土蠲市廛之租稅千村盡是樂郊凡此

殊恩更爲

異數皆由我

皇上愛民以實而不以名斯致治務本而不務末會哺

鼓腹羣知

帝力之難忘浹髓淪肌共感

皇仁之莫報輿情激切衆志攸同謹代達其真誠冀仰

邀於

宸鑒從此閩疆日暖益深蒼生激勸之私海嶠波恬永

藉

聖主靈長之福茲據布政使李發甲詳據闔省老人里

民等僉籲代

題恭謝

天恩前來臣不敢壅於

上聞謹會同閩浙總督臣范時崇合詞具

題伏乞

睿鑒施行爲此謹

題

巡撫貴州兼理湖北川東等處地方提督軍  
務都察院右副都御史臣劉蔭樞謹

題爲懇請代

題恭謝

天恩事據貴州布政使司布政使遲炘按察使司按察  
使李世仁詳稱欽惟我

皇上德竝乾坤功高宇宙統百千萬國欣戴弘仁歷五

十二年漸濡厚澤恭逢

聖壽之初度敬仰

恩綸之特頒禮洽幽明天人悅豫惠周朝野老幼懽呼  
地租與丁賦俱蠲閭閻盡遊化日淹滯共青災  
竝豁囹圄無泣秋風恤商旅而減征軫戎行而  
頒賞羅英拔士不令野有遺賢表善旌良務俾  
封堪比戶至文臣武弁尤荷

殊恩合裕後光前總霑

異數敷天懽慶率土謳歌本司等謏劣庸材猥邀

盛典旣榮及夫祖考且蔭逮乎妻孥感激難名私衷莫

達伏祈代

題恭

謝庶得少展微忱又准貴東道白璜貴西道鄧之琮

移稱欽惟我

皇上堯仁蕩蕩舜德巍巍作

君作師允綏猷乎九有曰富曰壽行錫福於萬方恭遇



大慶之期特頒

覃恩之詔格神尤思重道睦族亦尚引年念切養民蠲  
租同減稅而竝舉慮同衛國錄舊共恤勞以兼  
施湯網三開耆災必宥虞門四闢潛伏咸收猶  
復加惠臣僚俾得均邀增秩雖

恩榮不無差等而感激固有同心本道等自媿凡材亦  
叨加級且蒙封贈准照職銜揣分奚堪感

恩難已懇請代

題達

謝等情到司准此又准兩營遊擊魯岱等移稱欽惟

我

皇上文謨定鼎武烈承乾威震殊方羣仰雷霆萬里澤

流薄海共欣雨露九天茲當癸巳仲春恭際

六旬大慶遂飛

鳳詔特煥

綸音禮幽於以格明由內因而達外既親親老老之徧

及亦貴貴賢賢之倍優會見士慶彈冠民嬉鼓  
腹更知商安歸市兵樂休戈伏讀

詔書內開在外武官三品以下各加一級又照新銜封  
贈岱等韜鈴下士介胄末員獲叨加級之榮復  
沐封贈之典心殊感激分實睽違合移請轉詳  
代

題恭

謝以伸微忱等情到司准此又據貴陽十一府知府

同知通判楊文鐸等詳稱欽惟我

皇上聰明睿知文武聖神德軼唐虞九土咸忻光被歷  
符羲昊萬年永慶凝庥恭逢

花甲初周快覩

龍章誕布天地鍾靈而首出郊祀特先帝玉嬪運而挺  
生明禋用徧親親是篤恩沛

天潢聖聖相承禮隆曲阜廛保赤則槩蠲稅租敦引  
年且優給粟帛貸罪恤刑圉圉不枉減征絕擾

闕市無稽賞賚特周乎武夫搜羅尤徧於髦士  
迨夫內外俱霑優賚臣僚更予恩施非徒爵秩  
之槩增亦且封蔭之有等信大澤涵濡罔極宜  
羣情忭舞無涯職等猥以凡材膺茲非分身承  
加級恩被

貤封頂戴不勝悃忱莫達爲此瀝情陳懇轉請代

題恭謝

天恩又據貴筑等三十七州縣焦延祉等詳稱欽惟我

皇上德竝勲華仰光被者百千萬國恩侔天地沐膏澤  
者五十二年恭遇

壽躋六旬喜見澤加四海深山父老扶杖而慶

詔書之頒滿路兒童騎竹以迎天使之至合祀賞蠲宥  
之竝舉統遐邇內外以蒙庥至

詔書內開在外文官自四品以下俱各加一級又陞級  
改任者著照新銜封贈欽此聞

命自天感激無地惠徧盈廷而不遺夫荒徼寵渥大吏

而亦及於末僚仰見

聖明周詳

皇恩浩蕩敢不深自策勵圖報禮於將來惟有喜叶賡  
颺祝添籌於無量爲此籲請代

題恭謝

天恩又據闔省舉貢生員楊長春等呈稱竊惟

萬壽無疆沛殊恩於天末

一人有慶普大化於邊陲旣天人之胥洽抑中外之交

孚廼者設科增額尤重賓興兼之髦士明經亦  
加

異數俾赤水潛鱗咸思奮躍黔山小草亦被欣榮長春  
等曷禁懽呼難伸頌禱伏乞代

題庶大鈞之溥被永泐於巖疆下士之微衷上達夫  
天聽又據闔省鄉耆民人商賈舒炳等呈稱康熙五十  
二年三月十八日恭遇我

皇上六旬萬壽



恩詔遐頒雖覆載之高深非愚氓所能測識而

絲綸之宣布在黎庶實共見聞享帝格神敦倫重道官  
僚盡沐渥澤兵弁亦荷恩施伏念免糧免丁有  
加無已恤貧恤老每進彌周軫獄訟之牽誣好  
生德洽嚴征徭之科派藏富恩深禁豪惡禁猾  
胥閭左免擇肥之患飭假兵飭奸棍花村無夜  
吠之驚且關稅絕橫征牽車牛者忻適樂國津  
途鮮騷擾服羈縻者快履周行

洪恩固亘古希聞欣戴亦生民未有轉請代

題用伸恭

謝又據兩營兵丁雷士龍等呈稱竊惟本年三月恭  
逢

萬壽六旬

詔旨遠頒

皇恩誕播其他祀神尊聖睦族庸勲以及體臣子庶之  
仁養老育才之典

洪慈莫量戎士何知惟是

睿謀安不忘危文兼奮武爰錄功而恤舊滿漢不遺且  
飭伍而賞勞要荒一視惠施普逮寧惟恩比投  
醪賚予親霑不止感同挾纘憶當年投石超距  
士厲同仇看此日士飽馬騰人多矢報區區有  
志耿耿欲伸敢懇詳請代

題等情到司據此該本司看得幽明上下無非廣運  
所周中外邇遐難罄涵濡攸暨仰湛恩之汪濊

不遺乎蠻貊羅番欣被德而懽呼豈辨夫官民  
兵衆微獨本司感戴肫誠迫切求

上達且據通省文武大小各官移詳暨紳士民商兵丁  
人等亦各具呈前來情詞迫切合之本司感謝  
之私無異不敢壅於

上聞理合彙詳統候

題達等因到臣該臣看得道久化成共知

仁者必壽澤流潤物羣歌

至德難名合中外以均霑貴賤一體舉遠近而兼施大  
小胥孚戴

天而忘其高亦思祝禱仰

聖而忘其力不廢謳吟願既結於中心欲賡颺而無路  
情實迫而思吐爰繕疏以陳詞既據布按二司

貴東貴西二道臣標兩營遊擊兵丁各府州縣  
官員闔省紳士耆老商民詳呈前來臣謹代

題恭謝

天恩伏乞

睿照施行謹具

題

知

巡撫廣西等處地方提督軍務兵部左侍郎  
兼都察院右副都御史加三級臣陳元龍謹  
題爲欽奉

詔書事欽惟我

皇上

仁壽推恩

昇平錫福太和洋溢於宇宙

德意感格於神人在位奉職者邀錫類裕後之榮因  
公懼咎者開補過自新之路肆青解網而圜圉  
爲之一空息訟除苛而閭里從茲不擾廣諮訪  
則利弊無不周知崇節孝則風俗咸歸醇厚以  
逮嚴加派飭關津禮高年賑無告煌煌

詔旨滿地春溫藹藹

綸音普天膏雨凡屬大小諸臣以及紳士軍民人等無  
不踴躍歡忭羣呼

萬歲隨即日行布政司騰黃賫送提鎮及頒發闔省文  
武各衙門一體欽遵曉諭軍民外謹將奉到

詔書日期理合具

題伏乞

皇上睿照施行謹具



題

知

朝鮮國王臣李焞

言康熙五十二年閏五月二十七日

欽差勅使特頒

皇上慶壽

詔旨臣與一國臣民不勝歡忻感激謹奉

表稱

謝者臣惇誠惶誠恐稽首頓首

伏以

鳳歷方綿匝寰區而同慶

鸞書誕降辱

使節之載臨懼忤之餘感篆曷已伏念臣謹保緒業

叨際

昌期荷字小之

洪恩無階報荅殫拱

極之微悃祇切瞻依何圖

一視之仁遠

頒十行之札珍函乍啟恍

玉音之親承

睿澤旁流仰

聖眷之深篤榮出恒例

寵冠諸藩茲蓋伏遇

皇帝陛下

金  
德洽邇遐

運屬亨泰

光前軼後超百王而罕倫

厚往薄來致萬國之咸悅遂令鰥域亦被

鴻施臣敢不永戴

皇靈彌虔侯度地徧東海迹雖阻於荀班

壽獻南山誠自罄於華祝臣瞻

天仰

聖無任激切屏營之至爲此具本謹具奏

聞

萬壽盛典初集卷十七

欽定四庫全書

萬壽盛典初集卷十八

典禮五

養老一

康熙五十二年三月十八日恭逢

聖壽六十正誕直省在籍諸臣及人民耆老赴京慶祝  
者四方雲集三月初旬咸會

闕下

上命查耆老人數有水土不服習者令太醫院察治

是月初一日大學士王揆等傳

旨問各省老人有多少在京各省現任京官於十二日咨送內閣典籍廳查明啟奏

初八日南書房大學士王揆等奉

上諭朕聞各省為祝萬壽來者甚衆其中老人更多皆非本地人時屆春間寒熱不均或有水土不服亦未可知爾等即傳與漢官等倘有一二有恙者即令太醫院看治務得實惠以知朕愛養老者之至意欽此



傳知在京官員遵

旨欽奉施行

十七日甲午

上自暢春園還

宮直省臣寮士庶夾道懽迎耆老進前跪獻

萬壽觴

上輒止輦慰勞夙辦果餌食席徧行頒賜是日

諭大學士溫達等查八旗滿洲蒙古漢軍漢人大學士

以下民以上年逾六十五歲者於本月內擇日  
賜宴其八旗滿洲蒙古漢軍以至包衣佐領下  
年七十以上老婦於老人賜宴後擇日送至

皇太后宮賜宴

三月十七日大學士溫達等奉

上諭今歲天下老人為朕六旬大慶從數千里匍匐而  
來如何令其空歸欲賜伊等宴然後遣回著查八旗  
滿洲蒙古漢軍漢人大學士以下民以上年逾六十

五歲者奏聞在本月二十三兩日擬定一日賜宴  
預為奏聞便於備辦內有艱於動履不能前來者聽  
其勿來能來者俱令其來即不能來者應得分例朕  
必另行頒賜詔內有恩賜老人一款凡在恩賜款下  
者於各名下註明已在恩賜之列至於奴僕不在所  
查數內今時令漸暖賜宴後即令伊等各回原籍耕  
種再查八旗滿洲蒙古漢軍以至包衣佐領下不論  
官員閒散人等年七十以上老婦奏聞俟老人賜宴

後再定一日送至

皇太后宮賜宴內有艱於動履不能前來者聽其勿來能  
來者俱令其來若有貧乏不能來者著各該管處協  
助車馬使之前來俱開真實年歲不可捏報特諭欽  
此

是日又

諭宗人府選宗室子孫充授飲老人使令

大學士溫達等奉

上諭諭宗人府王以下至宗室子孫內年二十歲以下  
十五歲以上人品聰慧能備衣服者揀選六七十人  
送至朕前以備授飲老人使令朕之子孫亦皆派出  
青帶之人一員不用欽此

是日又傳

諭直省老人十八日齊至前朝聽禮部官指示行禮

先是十一日南書房翰林等奉

上諭各省祝萬壽老人俱於十七日在西直門外本省

龍棚下齊集接駕十八日齊至前朝外聽禮部指地方行禮行禮後若再至龍棚恐城門擁擠老年之人實有未便況十七日朕進宮時經過各省龍棚諸老人已得從容瞻仰十八日行禮後諸老人不必再至龍棚下接駕爾等傳與各省漢官徧諭各省老人知悉特諭

十八日乙未

上御殿受朝賀直省來京耆老臣民各隨班次行禮是

日頒

恩詔通行天下令所在有司察例賜恤耆老

詔款內一八旗滿洲蒙古漢軍兵丁及內扎薩克喀爾喀等蒙古年七十八九十以上者分別賞賚至百歲者題明給與建坊銀兩一軍民年七十以上者許一丁侍養免其雜派差役八十以上者給與絹一疋綿一斤米一石肉十斤九十以上者倍之若百歲者題明給與建坊銀兩

二十四日辛丑

命二十五日賜直省老人宴於

暢春園正門前復

諭戶部等衙門會議來京耆老恩恤從優具奏

戶部等衙門遵

旨為

皇上六旬大慶各省來朝六十五歲以上官員百姓數  
目查明繕摺具奏奉



旨將伊等明日齊集正門外賜宴遣皇子領侍衛內大臣侍衛部院衙門官員內廷翰林公同賜宴令得均食百姓俱係生於村野之人即有失禮者亦聽其便此內在詔款應得恩恤者吏戶禮兵四部會同查明比彼處畧為加厚今日即行議奏

戶部等衙門會議六十五歲以上不議外七十歲以上者

詔款內應賞綿絹等物折銀給與外加賞布各二疋八

十歲以上者加賞布各四疋九十歲以上者加賞布各六疋繕摺具奏

上硃筆批出諭旨伊等遠來絹布等物如何稱朕之意九十歲者人各賞銀十兩八十歲以上各賞銀八兩七十歲以上各賞銀六兩六十五歲以上伊等既來亦各賞銀一兩

二十五日壬寅禮部等衙門引六十五歲以上老人大學士以下民以上至

暢春園正門前東西嚮列坐敷席設几自北而南東

西前後各十餘行東坐西嚮大學士臣李光地

臣王揆吏部尚書臣吳一蜚戶部尚書臣張鵬

駙禮部尚書臣陳詵刑部尚書臣胡會恩都察

院左都御史臣趙申喬吏部左侍郎臣李旭升

右侍郎臣王頊齡戶部左侍郎臣王原祁右侍

郎臣廖騰燧工部左侍郎臣阮爾詢右侍郎臣

劉謙內閣學士臣彭始搏臣鄒士璉左副都御

史臣崔徵壁通政使臣郝惟諤翰林院檢討臣

嚴思位兵部郎中臣許康錫工部員外郎臣夏

疇欽天監右監副臣臧積德春官正臣何君錫

靈臺郎臣劉一葵等二十餘人次列直省耆民

二千餘人西坐東嚮致仕吏部尚書臣宋肇誥

封戶部尚書臣張烺致仕吏部尚書臣徐潮原

任戶部尚書臣王鴻緒致仕禮部尚書臣許汝

霖原任工部尚書臣徐元正原任吏部左侍郎

臣李錄予致仕吏部右侍郎臣仇兆鰲原任禮

部右侍郎臣田種玉原任工部左侍郎臣李元

振右侍郎臣彭會淇原任左副都御史臣勞之

辨原任福建巡撫臣宮夢仁原任右通政臣楊

篤生原任大理寺少卿臣朱廷鉉臣陳嘉績原

任翰林院侍講臣彭定求原任左諭德臣秦松

齡臣鄭開極臣楊大鶴原任右贊善臣田成玉

臣尤珍原任御史臣鹿賓原任廣西蒼梧道臣

彭演原任四川什邡知縣臣俞曰都等二十餘  
人次列直省耆民二千餘人坐定領侍衛內大  
臣公阿靈阿等傳

諭曰今日之宴朕遣子孫與爾等分頒食物執爵授飲  
當頒食授飲時勿得起立以示朕養老尊賢之至意  
於是執事人員次第陳設殽饋八簋品列庶羞百  
果之槃六穀之飯領侍衛內大臣侍衛部院官員  
內廷翰林往來勸侑前後以徧無不充飫食畢

南書房翰林等捧出

御書諭旨宣讀於衆曰諭各直省老人書稱文王善養  
老者孟子云七十者非帛不煖非肉不飽帝王之治  
天下發政施仁未嘗不以養老尊賢為首務近來士  
大夫只論做官之賢否移風易俗之效驗所以不暇  
講究孝弟之本心朕因今日之會特宣此意若孝弟  
之念少輕而求移風易俗其所厚者薄而其薄者厚  
矣爾等皆是老者比回鄉井之間各曉諭隣里須先

孝弟倘天下皆知孝弟為重此誠移風易俗之本禮樂辭讓之根非淺鮮也昨日甘霖大沛四野霑足朕心大悅爾等無悞農時速回本地特諭宣讀畢眾耆

老懼忤稽首

諸皇子乃出率諸皇孫及宗室子弟五十餘人親執爵觴授老人飲佐以名茶自大學士以下民以上往來勸侑前後以徧無不酣適頃之

上出御幄陞座眾老人皆翹首仰瞻



聖顏萬呼之聲浩若山海

上命扶掖八十歲以上官員致仕吏部尚書宋瑩誥封  
戶部尚書張烺等數人至

御座前

親賜酒一卮又

命扶掖九十歲以上耆民莊國興等數人至

御座前

親賜酒一卮於時風日清和禮儀詳整

皇情霽暢衆志歡騰萬國一家熙熙皞皞近在階陛大

學士臣李光地臣王揆等跪奏曰

聖壽前逾月晴和

聖壽後應時雨澤皆由

皇上大德上格天心百祥協應臣等不勝忻躍今蒙

恩賜宴徧及臣民天潢執爵寵踰非分誠曠古未有之

隆施也致仕吏部尚書臣宋犛臣徐潮等跪奏

曰臣等違覲

天顏近者數年遠者十數年今見

皇上精神倍於從前真是法天行健蒙

恩賜宴恩禮隆重萬國臣民人人感激惟願自今以後

十載一來慶祝

聖壽無疆也

駕起還

宮隨傳

旨賜大學士李光地等致仕吏部尚書宋犖等四十八

人袍帽硯有差又

賜直省來朝耆老四千二百六十八人銀兩有差諸臣  
及耆老各謝

恩而退

是日

賜七十歲以上大學士李光地王揆尚書吳一蜚陳詵  
左都御史趙申喬侍郎王頊齡王原祁廖騰烽  
致仕尚書宋犛許如霖原任尚書徐元正致仕

侍郎仇兆鰲煖帽各一頂團龍緞袍掛各二件  
松花石硯各一方誥封尚書張烺原任侍郎田  
種玉李元振彭會淇原任巡撫宮夢仁涼帽各  
一頂團龍緞袍掛各二件松花石硯各一方靈  
臺郎劉一葵原任諭德秦松齡煖帽各一頂團  
龍紗袍掛各二件松花石硯各一方副都御史  
崔徵壁通政使郝惟諤檢討嚴思位春官正何  
君錫原任少卿陳嘉績原任諭德鄭開極原任

蒼梧道彭演原任知縣俞曰都團龍紗袍掛各  
二件松花石硯各一方

賜六十五歲以上尚書張鵬翮胡會恩侍郎李旭升阮  
爾詢劉謙內閣學士彭始搏鄒士璉郎中許康  
錫員外郎夏疇監副臧積德致仕尚書徐潮原  
任尚書王鴻緒原任侍郎李錄予原任副都御  
史勞之辨原任通政楊篤生原任少卿朱廷鑑  
原任侍講彭定求原任諭德楊大鶴原任贊善

田成玉尤珍原任御史鹿賓松花石硯各一方  
是日宴賚九十歲以上老人直隸曹鳳全等二  
十三人江南省莊國興等八人山東省劉名科  
一人湖廣省呂永年一人浙江省沈玉揚等三  
人銀各十兩

八十歲以上老人直隸張聘潛等四百三十三  
人江南省邱體華等八十人山東省閔見等十  
九人山西省田畯等二人河南省蕭冲斗等三

人陝西省張席珍等二人湖廣省劉元志等四  
人浙江省鍾國浩等三十五人江西省吳嵩齡  
等五人福建省張獻福等三人廣東省羅科等  
二人銀各八兩

七十歲以上老人直隸張奇蔭等一千四百四  
十九人江南省應元等一百十四人山東省王  
銓等七十八人山西省李錦等三十六人河南  
省董朝輔等七人陝西省張鴻等十一人湖廣



省辛國忠等十五人浙江省鮑守一等二百二  
十五人江西省甘象龍等十一人福建省吳宏  
祖等十人廣東省劉遐齡等十人廣西省李楨  
等三人雲南省吳學文一人銀各六兩

六十五歲以上老人直隸李三省等一千四百  
九人江南省梅奇等九十一人山東省于定邦  
等六十三人山西省商丕祚等七十一人河南  
省徐元亮等十三人陝西省王丕猷等五人湖

廣省沈岐注等二十六人浙江省徐聖功等一百六十二人江西省曾譽等十七人福建省林洪京等十三人廣東省鮑亦輔等十二人廣西省宋珍玉一人貴州省秦毓華一人雲南省湯執中一人銀各一兩

萬壽盛典初集卷十八